

Қатар Ислом молияси ўз мақомини мустаҳкамламоқда



11:34 / 21.04.2025 1104

Қатар Ислом молияси соҳасидаги глобал етакчи мақомини мустаҳкамлашда давом этмоқда. Бу ҳақда 11-Доха Ислом Молияси Конференциясида маълум қилинди. Мамлакатнинг стратегик ташаббуслари, мустаҳкам ҳуқуқий базаси ва инновацион молиявий ечимлари бу соҳадаги муваффақиятини таъминламоқда.

Жадал суръатда ўсиб бораётган соҳани замонавий технологиялар ва ахлоқий инвестицияларга бўлган муносабат қўллаб-қувватламоқда. Қатар нафақат минтақада, балки бутун дунёда ислом молияси марказига айланмоқда. Мамлакатнинг глобал ислом молияси тенденцияларини шакллантиришдаги фаол роли ва барқарор иқтисодий муҳити унинг ушбу соҳадаги етакчилигини янада мустаҳкамлайди.

Ташкилий қўмита раиси профессор доктор Халид ибн Иброҳим Ал Сулайти ўз нутқида шундай деди: «Технологик тараққиёт энди фақат ёрдамчи восита бўлиб қолмай, балки глобал иқтисодий ва молиявий тизимларни ўзгартирувчи асосий кучга айланмоқда».

Профессор Ал Сулайти таъкидлаганидек, молия соҳасининг келажагини шакллантираётган энг муҳим жараёнлардан бири бу — блокчейн ва сунъий интеллектни (AI) интеграция қилишдир. Блокчейннинг шаффофлиги ва марказлашмаган хусусияти, AI'нинг таҳлил қобилияти ва аниқ қарор қабул

қилиш имкониятлари билан уйғунлашиб, ақлли ечимларни таклиф этмоқда.

У шундай саволни кўтарди: «Бу технологиялар ривожланишда давом этар экан, ислом молиясининг келажаги қандай бўлади?»

Dukhan Bank раиси шайх Абдулла бин Фаҳд бин Жассим Ал Тани таъкидлашча, финтех ислом банк-молия тизимини сезиларли даражада ўзгартирмоқда. AI ва блокчейн технологиялари бу ўзгаришда ҳал қилувчи аҳамият касб этмоқда.

Унинг сўзларига кўра, технологиялар молиявий таҳмин (прогноз)ни амалга ошириш, таваккалчилик бўйича таҳлилни кучайтириш ва банк хизматларини самарасини оширишда жуда муҳим рол ўйнайди.

Ислом фикҳи халқаро академияси бош котиби профессор, доктор Кутаб Сану эса қўшимча қилди: «Ислом молияси анъана ва замонавийликни уйғунлаштирган ҳолда, иқтисодий самарадорлик ва ахлоқий тамойилларни тарғиб қилувчи моделни таклиф этади. Бу тизим бойликни ўсиши ва ҳимоя қилинишига хизмат қилади, шу билан бирга жамият ва бутун инсоният фаровонлигига ҳисса қўшади. Блокчейн ва AI орқали бу соҳани янада юксалтириш имкониятлари катта»

Конференцияда банк, молия, академик гуруҳлар ва давлат ташкилотлари вакиллари иштирок этиб, ислом молияси соҳасидаги ривожланиш тенденциялари, инновациялар ва глобал муаммолар юзасидан фикр алмашишди. Бу тадбир ушбу соҳада билим ва етакчилик платформаси сифатида ўзини намоён этди дейиш мумкин.

Манба: thepeninsulaqatar.com